

Novas regiuns sco circuls da scussiun e da concurs

■ **(cc) Sco consequenza da la refurma dal territori en il chantun Grischun ston er vegnir adattadas las structuradas dals circuls da scussiun e da concurs.** La regenza ha lantschà la consultaziun tar ina lescha introductiva tar la lescha federala davart la scussiun ed il concurs. Proponì vegn in model cun in circol da scussiun e da concurs per regiun.

Cun la refurma dal territori en il Grischun vegnan schliads ils circuls sco corporaziuns da dretg public cun agens organs. Las 14 corporaziuns regiunalas ed ils 11 districts vegnan remplazzads tras 11 regiuns. Questa reorganizaziun dal plaun statal d'amez ha er ina influenza sin ils fatgs da scussiun e da concurs en il Grischun. Oz furma mintga circol politic in circol da scussiun e mintga district in circol da concurs. Dus u plirs circuls respectivamain districts pon però unir la gestiun e l'administraziun dals uffizis da scussiun e da concurs. Quai è gia vegnì fatg, uschia ch'igl existan actualmain anc 25 circuls da scussiun en il chantun.

En in sboz tar la lescha introductiva tar la lescha federala davart la scussiun ed il concurs ha la regenza preschentà sia proposta per concepir da nov ils circuls da scussiun e da concurs. En il futur duai pia mintga regiun furmar in circol da scussiun e da concurs. Cun quai duai er vegnir abolida la separa-

ziun da las duas instanzas. Questa separaziun n'è betg sa cumprovada en la pratica. Las regiuns duain pudair decider sezzas sch'ellas vulan unir lur uffizis da scussiun e da concurs sin plaun sur-regiunal. Ultra da quai duain ellas avair la pussaivladad d'endrizzar filialas. Tge organizaziun ch'ils uffizis da scussiun e da concurs duain avair duain reglar las regiuns. Tscherts princips vegnan però reglads en moda unitara en la lescha.

En il sboz da consultaziun vegn er preschentada in'alternativa tar quest model da structura. Tenor quella duain vegnir stgaffids 11 circuls da scussiun regiunalas ed in circol da concurs chantunal. En vista al fatg che incumbensas quasi-giudizialas ed administrativas duain vegnir surdadas tras la refurma dal territori a las regiuns stgaffidas da nov preferescha la regenza però la soluziun cun 11 circuls da scussiun e da concurs.

Actualmain èn las disposiziuns executivas vertentas tar la lescha federala davart la scussiun ed il concurs fixadas sin il stgalim d'ina ordinaziun. Cun la nova lescha introductiva tar la lescha federala duai vegnir stgaffida la finala ina soluziun confurma a la constituiziun.

La consultaziun dura fin ils 13 da settember 2013. Ils documents pon vegnir consultads en l'internet sut www.gr.ch / Consultaziuns currentas